

四庫全書

集部

欽定四庫全書

集部
後樂集卷三
四

詳校官庶吉士臣翁樹培

主事臣呂雲棟覆勘

謄錄監生臣陳
祁

欽定四庫全書

後樂集卷三

宋 衛涇 撰

內制

錢象祖辭免參知政事不允詔

勅具悉古有格言共政其惟圖舊時方多事強本斯可
折衝卿德鉅才全器閎識遠身歷三朝之久望參諸老
之間自陟進於樞衡益具瞻於巖石比頒召節入侍經
幃屢陳造膝之嘉猷莫匪濟時之急務與其養恬祠館

以奉清閒之燕孰若密禪廟論以究圖回之勲爰攷師
虞復陪鼎席昔宋庠之於慶歷公著之在元豐皆以宣
力四方再登兩社迄臻大用俱為名臣朕之遇卿抑何
異此其殫素蘊勿徇冲懷所辭宜不允

錢象祖再辭免參知政事不允詔

省表具悉人君虛己任賢惟推誠而相與賢者得時行
道豈辭位以為高卿出入三朝險夷一節曩因去國每
興當饋之懷旋起殿藩即下趣歸之詔衆方想聞其風

采朕尤喜見於儀刑自矜啓沃之規采識忠誠之蘊屬
政塗之虛位疇物望以登庸夫思之至故用之為不輕
信之篤故待之為無間厥今北敵雖求和而備禦不
可以暫弛西陲雖耆定而控御宜急於良圖所當惜日
而有為庶賴同心而共濟深謀遠慮方與卿等勉之曲
謹小廉顧豈朕所望者所辭宜不允仍斷來章

賜資政殿學士中大夫知隆興府充江西路安
撫使程松辭免除資政殿大學士四川制置使

兼知成都府恩命不允詔

勅程松省所奏劄子辭免除資政殿大學士四川制置使兼知成都府恩命事具悉維昔擇建蜀牧必屬侍從名臣其自二府臨鎮者由乾德至今裁六七人其選不益遴乎卿以英髫早躋嚴近竭節匪躬有排奸之勇持平處正真凝重之才訏謨斗樞之度已疇碩望奉使并絡之域亶藉忠親用加學士之大稱全付西南之鉅屏寵靈特異節制加尊維文翁化俗之方本於勸學若武

侯經遠之畧先在養民寬予顧憂咨爾多算况王事靡
盥義不得辭人才至難無出卿右當思養志之孝無靳
叱馭之勤所辭宜不允

辛弃疾辭免除兵部侍郎不允詔

勅具悉朕念國事之方殷慨人材之難得外而鎮臨方
面欲藉於威望內而論思禁列將賴於訏謨熟計重輕
之所闕莫若挽留而自近卿精忠自許白首不衰敷歷
累朝豈為舊德周旋劇任居有茂庸建大燾以于蕃趣

介圭而入覲雖戎閫正資於謀帥而武部尤急於需賢
勉圖厭難之勲宜畧好謙之牘所辭宜不允

賜通議大夫丘宓辭免除刑部尚書充江淮宣撫使
撫使不許辭免恩命不允詔

勅丘宓省所奏劄子辭免除刑部尚書充江淮宣撫使
不許辭免恩命事具悉朕惟義不可以不明功固當於
馴致矧乃世讐之未復適茲邊釁之屢聞不得已而興
師顧莫先於圖舊以卿躬士衡之明鑑有公瑾之盛心

閱歷之多素存謹重忠義所激靡辭劇艱屬虛中權無
逾宿望俾盡提於戎律仍進陟於文昌惟威名之獨高
諒施設之易信叩囊底之智姑借重於疆陲攄堂上之
竒佇折衝於廊廟裨贊自詭何言之謙所辭宜不允

錢象祖辭免興復元依舊知紹興府不允詔

勅具悉昔黃霸守潁川嘗貶秩八百石久之宣帝思霸
長者為下詔褒揚復秩中二千石所以重師帥之任而
風示天下也矧卿夙居鄰輔起鎮東藩十連資屏翰之

勲千里徯中和之政儻微文之是徇非崇秩之盡還則
恩禮未昭吏民安仰豈稱朕禮貌大臣之意乎亟祇茂
恩毋事多遜所辭宜不允

錢象祖辭免召赴行在不允詔

勅具悉朕思靖邊氛興懷舊弼卿精忠體國沈慮識時
召自輔藩倚摠賢蘊矧淝河之東密邇王室謂宜朝受
命而夕引道胡為上章以疾來諗惟吾股肱之望義均
戚休毋徇一身出處之私勉副公朝圖任之切正茲渴

想其畧撓辭所辭宜不允依已降指揮疾速赴行在不
得再有陳請

錢象祖辭免再知紹興府不允詔

勅具悉朕惟舊弼實心腹之臣輔旬迺股肱之郡方起
賢而自近矧謀帥之維難卿久踐政塗亶為民望綢繆
萬務具殫夙夜之勤翌贊遠圖隱若深長之慮粵從去
國每切興懷茲稽輿論以賜環亟俾東藩而制閭徒得
君重庶期憂顧之寬其沃朕心式示來歸之漸成命胡

稽於俟駕冲襟尚執於循墻宜體國事之重輕勿泥身
謀之出處其蠲巽牘以對茂恩所辭宜不允不得再有
陳請

錢象祖乞祠祿不允詔

勅具悉卿環望宏材為時柱石深謀遠慮為國著龜起之
輔藩規以自近寬大平和之政七郡之民安之緬想崇
陰益彰世德矧神明之方壯奚疾恙之能侵胡為抗疏
之聞遽動賦歸之興河東吾股肱郡端賴於分憂望之

古社稷臣豈忘於圖舊勉騰治最難徇冲襟所請宜不
允

賜復慶遠軍節度使差充鎮江府駐劄御前諸
軍都統制成閔辭免加食邑食實封恩命不允

詔

朕顓俊以尊上帝非惟常伯常任是賴亦惟賴虎賁之
長越在外服簡恤爾士尚迪果毅以登乃辟肆予一人
汝嘉用承天休賚爾多邑誕告有衆咸曰允哉毋或固

辭共朕之詔所請宜不允

賜成閔上表再辭免如食邑實封恩命不允不
得再有陳請詔

王者公子奪以馭臣人臣明辭受以事上古今之通誼也日朕躬郊拜既均惠文武有懷宿將總戎於外雖無侍祠之勞而有制閭之功載加多邑以溥吾恩非妄予也卿其可異衆而獨辭乎所辭宜不允不得再有陳請

楊炳辭免除權吏部尚書不允詔

勅具悉天官冢宰之職歷代以來班序常尊至唐以宰
相兼領豈銓綜之得失闕人物之盛衰匪望實素孚識
鑒精敏莫副茲選卿秉心端亮履行粹夷論事有爭臣
之風掌誥得王言之體比繇小宰之任攝承常伯之班
繫爾宣勞於今彌歲處劇煩而有裕嘉平允之著稱官
無滯淹吏革謾隱肆疇已試之效孰如因任之宜昔山
濤密啓公奏而舉無失才左雄收異登竒而號稱孤絕
勉希前躅勿事遜辭所辭宜不允

楊炳乞祠祿不允詔

勅具悉文昌八座接武四近進退之際重輕繫焉屬當
多事之秋尤藉老成之望卿學識純茂履行方嚴親被
簡知徧儀華要比陞班於常伯仍冠席於邇英銓綜擅
平允之稱誦說廣緝熙之益疊疊憂時之論惓惓體國
之誠雖寇盜之潛奔正事幾之宜察盍攄至計叶濟遠
圖矧精神之方彊奚疾疚之為累遽祈均佚良咈眷懷
安服厥官姑惠予采所請宜不允

楊炳辭免寶謨閣直學士宮觀不允詔

勅具悉朕惟魁壘老成之望禁路所推出入進退之間
禮貌宜異矧挽留之弗獲尤眷寵之當加卿位冠文昌
時稱壽雋敷歷衆職周旋八年方倚重於典刑遽懇祈
於間佚神明猶壯衆惜孔戡之得歸官政閔勞難強汲
黜之為郡爰峻班於延閣以增責於真祠既自取之甚
廉胡抗辭而不已亟祇成命其畧搆函所辭宜不允

吳總辭免除工部侍郎不允詔

勅具悉中興以來元勳宿將孰如卿家父子兄弟朕方
慨慕前烈規恢遠圖顧瞻周行有如象賢獨無在吾左
右者是豈念功之意哉矧卿才畧優裕識慮精深出入
三朝更踐惟舊列職延閣通班禁路踰二十年可謂老
成之彥召從帥閫俾貳冬卿積望既高僉言咸允屬時
多事尤賴世臣益肩報國之誠毋負教忠之訓祇予寵
渥冀以辭為所辭宜不允

吳總辭免吏部侍郎不允詔

勅具悉國朝班院自元豐以來小宰分職而治員多闕少法密文繁惟武選為劇吏緣為奸人受其弊非得疏通明練之才何以甄別流品擿發隱欺卿毓德名門世濟其美踐敷中外資望甚高儀圖爾庸留以自近雖禁途密勿均倚告猷然起部優閑未殫閎蘊其以繕修之暇往參銓綜之公僉論既諧異函宜畧所辭宜不允

吳總辭免知鄂州不允詔

勅具悉鄂渚上流旁連蜀漢下控吳楚自昔用武之地

在今擇守尤難卿被遇四朝險夷一節召寘從橐出贊
元戎方倚壯猶勉從外補與其遠司於權牧孰如近畀
以蕃宣矧爾舊游諒多遺愛將肅清於氛祲抑有賴於
威名忠報是圖謙辭宜畧所辭宜不允

薛叔似再辭免端明殿學士侍讀依舊湖北京
西宣撫使不允詔

勅具悉元戎重寄襄漢上流非望實在衆人之先論議
攷平日之素不以輕授卿秉持一節際遇累朝期盡瘁

於國家曾何心於利祿比繇諭旨就畀宣威俄涉歷於
三時殫勤勞於庶務屬北兵之入寇在憂顧以方深朕
惟責之專者禮宜優任之隆者位必稱是用通班祕殿
視寵政塗肆體貌之有加諒觀瞻之益竦庶收來効迄
展壯猶撫章屢騰貶損特甚蓋體朕責成之意顧豈卿
辭官之時勿復重陳亟其祇拜所辭宜不允不得再有

陳請

招撫使郭倪乞賜重行竄責不允詔

勅具悉倚重戎昭方懋安邊之畧力陳私誼忽騰引咎
之章卿夙負雄材蔚為名將父子相傳於忠孝後先接
武於巖除將收地於河湟俾護屯於淮浦屬偏師之失
律於軍制以當明諒憂國而忘家豈以恩而掩義雖因
嫌而自別顧奚罪之可歸矧今已迫於秋防賴爾用張
於士氣若過形於貶損何所望於激昂其體至懷勉圖
偉績所請宜不允

張巖辭免除知樞密院事不允詔

勅具悉周用吉甫文武為憲於萬邦漢得留侯帷幄決
勝於千里矧圖回於遠畧端倚賴於訂謨匪疇經世之
材曷冠神樞之任以卿純誠許國茂識莖邦兩踐政塗
有同寅協恭之助久裨幾省多折衝厭難之謀罄竭一
心周旋歷歲屬政事之修欲攘於外侮而甲兵之問方
至於廟堂儻任責之既專庶成功之可必惟卿夙陪宥
密當有先定之規摹身寄安危爰俾進參於心腹顧允
諧於師錫且益聳於民瞻其即欽承無庸冲遜所辭宜

不允

張巖再辭免除知樞密院事不允詔

省表具悉朕惟文武之柄雖異股肱之寄實均蓋閒暇
必先政刑之明而兢業尤以時幾為急矧機會之投間
不容髮而樽俎之間期於折衝雖以無資之上才抑當
不分於用智庶幾算無遺策動有成功卿沈審善謀忠
誠體國粵自風憲紀綱之地置諸疑丞輔弼之聯出入
八年險夷一節屬孔棘於我圉期肇敏於戎公肆圖共

政之良俾正元樞之任盍祇休命奚徇冲襟若以盡瘁
為勞則今靡煩以它務儻謂不能者止則昔已著於茂
庸僉言允諧朕志先定拊髀而思頗牧舍爾其誰稽
首而遜夔龍豈予所望宜蠲來牘迄展壯圖所辭宜不
允仍斷來章

李壁辭免除參知政事不允詔

勅具悉昔樂正子為政賢者喜而不寐段干木在朝敵
人莫敢與爭蓋惟吉士斯勸相我國家用真儒迺無敵

於天下匪負棟隆之望曷禪柄任之圖以卿夙著家聲
蔚有時譽文章規姚姒之上忠信行蠻貊之邦非道不
陳於前言皆可復廷臣無出其右政將焉歸矧時庶事
之方殷必待宏才而共濟既選衆而後用顧於卿而何
辭萬幾之繁冀寬當饋焦勞之念一命而俯此豈循墻
遜避之時宜體至懷亟祇成命所辭宜不允

李壁再辭免除參知政事不允詔

省表具悉朕惟圖任共政期於補弊舉偏屬多事之未寧

得一賢而為重然望治雖切量才實難務因循者或怠於事功銳進取者又踈於謀畧患在文具無惻隱之實思得憂國如饑渴之人其心純於愛君而不徇名其智足以周物而無滯慮疇若予采信莫如卿爰自秩宗擢參宰席謹紀綱賞罰之柄懲苟且欺誕之風賴爾同寅惟今急務有用我者期月而可尚竊遲之若命官以相遜為能非其時矣矧千載休期之難得而先正教忠之謂何其絕撫函益攄素蘊所辭宜不允仍斷來章

李壁辭免權監修國史日歷同提舉編修勅令
不允詔

勅具悉朕惟史有三長提綱尤重法垂一定載筆實嚴
漢命鄼侯約講畫之規唐日元齡專纂修之任自昔必
資於近弼矧今允藉於鴻儒卿文摹六籍之華學繼諸
賢之統儷二班之父子相承筆削之謹嚴考三后之源
流素達禮刑之表裏參陪機務方懋遠猷典領策書宜
膺隆委况編年有世傳之法而著令以經術為宗討論

雖列於羣工折衷蓋歸於良輔裁其義例行成一家之言凡厥條章務述累朝之舊既孚衆望奚事多辭所辭宜不允

李壁乞祠祿不允詔

勅具悉朕惟國家待遇二三大臣之禮與百官執事異盖所以託股肱心膂而與之同休戚也去就之間奚可輕議卿以安石之文雅濟德裕之經綸比與政機實從人望屬時多虞警言奏日聞賴卿推誠協心畢力盡瘁方

內畧定朕甚嘉之何嫌何疑遽欲求去且逆黨盡誅邊
塵漸息信如卿之言矣獨不為朕講求安輯之方經理
之政乎朕思與卿等宵旰圖治日謹一日庶幾安不忘
危底於綏靖從容引疾自為計得矣而非大臣體國之
義也益殫忠慮毋徇小廉所請宜不允

倪思辭免禮部侍郎兼直學士院不允詔

勅具悉朕焦勞圖乂寤寐求賢矧予兩禁之英允矣三
朝之望久退安於真館誠渴想於辰猶且歲屬親祠時

當多事緝熙典禮期以接三神之歡播告訓辭將欲鼓
四方之動端賴寅清之助孰踰潤色之長皆爾故官實
諧師錫倚須前席之間宜不俟駕而行奚徇謙懷尚稽
成渙所辭宜不允

皇伯嗣秀王師揆加食邑實封制

門下朕肅時禋祀哀對神祇稽經循大報之彛練日得
中辛之吉祖功宗德聿嚴升侑之儀帝系皇支咸在駿
奔之列眷言伯父克相稜容爰首錫於徽章用答揚於

景貺誕稟明命亶告治朝具官某屬近而行尊身端而
行飭炳玉質金相之美衍銀潢璿萼之輝父子象賢襲
王封於樵李弟兄競莢綿世德於常華寵光萃於一門
恩意隆於九族駢旄苴纛峻元戎節制之權赤舄繡裳
視上宰班聯之貴甲第邇闕庭之邃壽宮仍使領之榮
喜見儀刑時趨表著當總章之展采率公族以侍祠翼
翼其隣嘉迺溫恭之度雍雍以相輔予陟降之容迄用
有成以作爾祉拓豐租於榦食加真采於圭臬於戲服

冠履而祀明堂東平實陪於漢禮分朕膳而親同姓滕
侯宜長於周盟益追孝於前人式永綏於令譽可依前
皇伯奉國軍節度使開府儀同三司充萬壽觀使嗣秀
王加食邑七百戶實封三百戶王者施行

皇太子榮王曦加食邑實封制

門下朕紹列聖之詒謀荷皇穹之申命護奉宗廟社稷
靡遑康寧以承上下神祇罔不祇肅攷三歲嚴禋之制
崇九筵必祀之儀禮備樂成精意孚於盥饗仁滂施厚

膏澤沛於黎蒸眷予主器之良宜守均釐之錫誕敷丕
號專告大廷皇子具官業尚淳修性資英敏咸韶濩武
韻凝鐘律之龢璜璠圭璋體具陰陽之粹疊疊盡事親
之孝孜孜殫就傅之勤密陪侍膳之恭尤篤含飴之愛
嘉溫文之日積信岐嶷之天成鼎席參華視上宰班聯
之峻坤維賜履煥真王典冊之榮疏寵寢優處窮采恪
茲當杪秋之吉迺竣重屋之祠孰共迓于鴻禧念莫踰
于元嗣爰舉邦彞之舊載加井賦之新於戲用德而典

神天既格三靈之貺受祉而施孫子永綿百世之基茂
對徽章益綏令譽可依前皇太子威武軍節度使開府
儀同三司榮王加食邑一千戶食實封四百戶王者施
行

皇伯檢校少保師垂加食邑實封制

門下朕卜季商之吉歲重屋之儀滌慮儼乎齋房承神
娛乎煗幄裸將有廟祖宗顧歆陟降在庭天地昭假載
省眇冲之質敢專福祉之蒙茂舉慶條宜先族老具官

其禋身端慤迪德粹純神明襲帝胄之華傳芳元凱博
雅佩詩書之訓儷美間平源愈濬而流長行既尊而屬
近貳公宏化峻參左棘之班授鉞總戎丕擁六旌之重真
館久頤于閒燕寢園祇奉於烝嘗適親圭幣之祠實相
豆籩之列偉肅雍之秉德陪獻饗以展容念劉氏祭酒
之賢厚周室執膺之賜中加邑采併實井腴於戲美萬
物之能盛多既荷綏成之貺親九族而致禋祀庸彰篤
叙之恩祇服寵光益隆壽嘏可依前皇伯檢校少保定

江軍節度使提舉佑神觀兼充秀安僖王園令秀王位
檢察尊長天水郡開國公加食邑五百戶食實封二百
戶主者施行

皇叔保康軍節度使師禹加食邑實封制

門下朕采冬官之遺制飭秋饗之上儀念王者之行明
堂既達馨香之薦若天子而謂叔父當隆親睦之恩矧陪
顯相之勞與覲熙成之佑肆頒褒綉用渙徽章具官某
色裕而氣馥體莊而資粹父子襲璇源之系不隕其名

第兄聯棣萼之芳則篤其慶眷禮優于三聖寵光華于一門孜孜殫信厚之誠疊疊迪中和之行建旄外屏有華秉鉞之瞻詔祿內祠采謹祝釐之奉屬嚴禋之備舉邈精意以潛通克竣裸獻之容亶自肅雍之助加爰田而奠食衍井賦以陪腴於戲斂時五福用錫庶民敢專鄉神亦之貺豈無他人莫如同姓宜首均家國之休勉迪前猷永綏令譽可依前皇叔保康軍節度使提舉佑神觀天水郡開國侯加食邑五百戶食實封二百戶主

者施行

隨龍保成軍節度使譙令雍加食邑實封制

門下朕循累聖之彛章被九筵之嘉薦銷土鳴而應律
逶迤雅奏之諧黼繡張而承神彷彿高靈之墮方舉欽
柴之禮肆興伐木之恩褒我信臣錫之惠衍具官某才
猷敏劭德度粹溫蚤依日月之光親際風雲之會西平
有子蟬聯增慶闕之華代邸修功密勿侍禁廷之邃威
儀嫻於上閣表著肅於所朝自履滿盈愈思謙畏清都

絳闕燕珍館以祝釐蕩節瑀戈擁齋旒而制閭屬時筮
祀相我稷容其因渥澤之頒申行爰田之賦以彰眷遇
以聳觀瞻於戲備物可以告神明既聿懷於多福友賢
而不遺故舊茲大賚於善人祇服茂恩益堅冲守可依
前隨龍保成軍節度使提舉萬壽觀臨海郡開國侯加
食邑五百戶食實封二百戶主者施行

保信軍節度使吳琰加食邑實封制

門下朕系隆景命祇適先猷布政頒常倣黃帝合宮之

制配天尊祖乘素商肅物之辰百禮洽而熙事成六樂
諧而淳音暢克相裨容之舉實繫左戚之良舍爵書勞
揚廷敷號具官某謙冲而自牧和裕而不流誦讀詩書
雅有游居之樂制節謹度不為富貴之移載念中興之
母儀孰踰憲聖之家法擁立稟簾幃之訓計安深社稷
之功肆爾一門冠於四姓仲叔季弟交輝槐棘之聯累
將重侯鼎列簪紳之盛自涉齋壇之峻退安珍館之熙
譽處采休典刑靡墜適講嚴禋之禮有來助祭之勤載

衍爰田以華茂屬於戲賜文武之胙在周人先異姓之
封褒湊淑之賢在唐室有同日之拜益綏吉履勉迪殊
徽可依前保信軍節度使提舉佑神觀廣陵郡開國公
加食邑五百戶食實封二百戶主者施行

少傅吳瓌加食邑實封制

門下朕推尊祖敬宗之心以靈承上帝憲規天矩地之
制以祇事合宮祀以一純二精穆卜素商之杪申以三
齋七戒吉蠲熙禮之成眷言四姓之英宜洽百神之祉

誕專綸綉亶告神綏具官某靖重而端莊忱恂而謙厚
聯芳棣萼夙推吳湊之最賢流澤椒塗時迺太任之近
系累奕葉重侯之貴稱外家左戚之良居惟業于詩書
動不踰於法度齋壇授鉞絢物采於元戎夏篆建壇亞
班聯於帝傳燕真祠而均佚冠茂屬以陞華粵臨右饗
之庭丕飭嚴禋之典威儀是力有來顯相之恭籩豆孔
嘉於赫高靈之墮肆頒餽惠庸渙徽章晉荒崇社之封
增衍爰田之賦於戲賀慶而親異姓敢專鄉於蕃釐賚予

以錫善人宜首膺於寵渥永綏譽處益介壽祺可依前
少傅昭化軍節度使充萬壽觀使進封崇國公加食邑
七百戶食實封三百戶王者施行

賜安南國王李龍翰如食邑實封仍加崇謙功
臣散官勲如故制

門下朕撫運重熙同仁一視饗帝秩九筵之禮對越在
天寧神得四表之驩丕冒出日眷南交之舊服輸北闕
之丹誠肆推拜胙之釐用亶在庭之聽具官某性資端

順氣概沈雄襲累世之圻疆邈處鳶飛之域稟中華之
正朔久通象譯之朝康寧踰衛武之年蕃衍侈隴西之
族念聲教遐霑于絕徼而琛航屢奉于職方屬導三歲
之彝躬祓一純之薦顧祀天祭地雖莫與于駿奔然望
日瞻雲實有勤于景慕豈無慶澤式寵藩臣增賁隆名
益渙元勳之籍申陪多戶載豐真采之腴以均遠邇之
思以洽穹祇之貺於戲主祭而百神享朕方欽荷于靈
祇謹德而四裔賓爾尚恪共于侯度祇承徽數益介壽

祺可依前特進檢校太尉靜海軍節度使觀察處置等
使兼御史大夫上柱國安南國王加食邑一千戶食實
封四百戶仍加崇謙功臣散官勲如故主者施行

光祿大夫知樞密院事廣陵郡開國公食邑四
千四百戶食實封一千四百戶張巖可加食邑
五百戶食實封二百戶制

朕按奉高之圖飭總章之祀我將我享對越天地祖宗
之靈汝翼汝為實賴股肱心膂之佐迄崇成于熙事宜

推行于慶條申以贊書錫之祉祚具官某疏通而鯁亮
慷慨而沈深正色立朝風采聞于天下謀王斷國智畧
湊于上前曩擢貳于繁畿旋懇祈于均佚作牧輔畿則
京師蒙福建牙方面則戎落懽威迺趣覲圭俾還政柄
蹇蹇盡匪躬之節休休有容善之心士氣浸伸人材
無壅比晉宥廷之長益攄籌幄之良公選將帥而軍之
紀律靡不張大明誅賞而國之綱維靡不肅折衝厭難
潛消畧地之萌固圉安邊尤謹防秋之備茲秩九筮而

佑饗允資一德之寅恭羽衛星陳擁皇輿而先後官聯
景附端使矩之委蛇顯相惟勤居歆有自增衍榦畬之
食益隆樞極之瞻以侈嘉祥以昭委注噫陟丕釐上帝
既默孚盱蠻之交以救寧武功宜克懋經綸之業欽承
予訓尚遠乃猷可

太尉李孝純加食邑實封制

門下朕嚴總章右个之禮以承神酌西都左戚之誼以
施惠三年大報具殫肆祀之誠四姓小族咸秉侍祠之

德舉邦彛而由舊渙廷綽以惟新具官臬器度端酥性
資夷雅慶善鍾于名閥典刑似其前人迺祖迺孫幾七
葉珥簪之盛難兄難弟駢一門授鉞之榮佩金印以聯
華燕琳宮而均佚藹然令聞表于茂嫺當少皞之御辰
祓九筵而展采星輪月節瞻遠駕以遙興風馬雲車沛
靈苻之來下庸廣配天之澤聿隆加地之恩實行榦畬
肇荒公社於戲昭受上帝既丕延簡簡之休錫予善人
其可後親親之眷勿忘謙恭以對褒嘉可依前太尉保

大軍節度使提舉佑神觀進封永寧郡開國公加食邑
五百戶食實封二百戶主者施行

少保謝淵加食邑實封制

門下朕飭躬齋戒涓日休成將歲事於合宮先入裸於
太室染盛潔而豐備璧玉精而華光受命於穆清敢專
鄉祝釐之福在廟駿奔走時則有侍祠之臣專以明綸
錫之純嘏具官某禋身肅括制行淑均富貴尊榮冠西
京之外戚風流醞藉迺江左之名家蚤繇東朝同氣之

親屢膺南宮特拜之寵橐兜戟纛聳上將之威儀銜統
紘綖煥孤卿之命服居靡期驕之習日嚴辨色之趨率
履無違承休匪懈屬竣儀於重屋首歸胙於層門有嘉
相祀之恭可後疏榮之渥載荒新邑增衍本封於戲決
太后之族親朕方奉慈顏而致養有福事則慶賀爾宜
先異姓以推恩祗服龍光永綏燕譽可依前少保保順
軍節度使充萬壽觀使丹陽郡開國公加食邑七百戶
食實封三百戶王者施行

太尉楊次山加食邑實封制

門下朕憲皇祐之舊章秩宗祈之明祀卜秋之辛而歲
事當日之午而迴車風馬顧歆彷彿靈旂之下星鷄飛
動滂洋惠澤之流眷言茂屬之良克相稜容之舉爰頒
制綉亶告朝倫具官某厚重而方嚴者龐而福艾龍韜
豹畧心傳黃石之編翟菲翬衣家衍曾沙之慶襲龜紫
而蹈布韋之習居膏粱而無氣體之移閨門之訓尤嚴
子弟之率唯謹夙宵匪懈譽處采隆屬神鵜右饗之庭

廼山立駿奔之列暨蕃釐之布護宜茂祉之函蒙益以
多田實之真采於戲用休申命

原缺

--	--	--	--	--	--	--	--

欽定四庫全書

後樂集卷四

宋 衛涇 撰

內制

丘宓辭免端明殿學士侍讀依舊江淮宣撫使
再除簽書樞密院事督視江淮軍馬不允詔

勅具悉朕惟烈祖之朝舊德夙望今焉幾人而卿魁壘
耆父為國壽雋巋然獨存豈天將啓我家中興之業畱
以遺朕意有在耶矧如才畧之雄足以當重任威名之

著足以成大功近者有事中原將指非人輕信妄動是
用輟卿筦鑰之寄盡護江淮之師而志念深長綜理詳
密按屯飭備厥績用茂屬邊烽之多警在憂顧以未寬
爰晉陟於機廷仍肇開於督府信任專則呼吸惟意風
采振則觀聽益新高皇遺平城之憂朕非獲已武侯追
先帝之遇茲迺其時注倚方隆勞謙宜畧所辭宜不允
薛叔似為秦陽神馬坡兵敗乞行遣不允詔

勅具悉卿以言論風旨受知烈祖為時名儒圖回經濟

之業夙所抱負輟繇近列往撫成師受任以來亦既累
月凡所規畫當已素定比頒命數增重事權北騎窺窬
指授諸將摧鋒挫敵今其時矣上章引咎豈朕所聞矧
事幾戒毫釐之差利害存呼吸之頃元戎一動衆心易
搖選命餉臣就為卿副合謀并智力控上流勉思報國
之忠勿徇潔身之計無罪可待所請宜不允

程松乞待罪不允詔

勅具悉朕惟西蜀邈在萬里之外未嘗一念或忘於中

矧時多虞謀帥尤重卿樞機夙望柱石全材比煩制閫
之行就畀宣威之任惟文武兼資之有素故安危注意
之靡殊屬北騎之犯邊致師徒之失律載披來奏良惻
予懷雖長慮遠謀備述修攘之序然折衝厭難允資帷
幄之籌兵將情驕當裁之以法財力虛匱姑濟之以權
卿固得以便宜朕弗從於中御亟展圖回之畧迄成者
定之功庶不負於深知亦有辭於永世上章引咎非所
欲聞無罪可待所請宜不允

程松乞祠祿不允詔

勅具悉朕顧瞻巴蜀在天一隅控制秦關綿地千里方
時無事謀帥孔艱矧今多虞擇才豈易以卿資兼文武
識達經權昔嘗參覈於斗樞茲命宣威於井絡發蹤指
示允嘉辟國之謀厭難銷盟顯著折衝之畧政俟勲名之
究式觀忠孝之全迺繇念親遽欲諗疾夫王尊叱馭豈
以家辭羊祜在軍何妨卧護中道而畫匪朕所期所請
宜不允

張巖辭免督視江淮軍馬不允詔

勅具悉捷書屢奏敵衆潛奔情偽巨量事幾貴審雖權宜之可用念國體之當全卿望冠廷紳任顯樞筦料敵之智臨事之勇威足以行號令明足以公賞罰朕固知之熟矣爰因宥密之地往提總督之權朕非務於佳兵卿具將於隆指揆萬全之長策成七德之雋功其在此行毋庸多遜所辭宜不允

宇文紹節辭免兼同修國史兼實錄院同修撰

不允詔

勅具悉朕惟信史之傳將垂永世之法雖迺圖回於多
事不忌敷述於先猷必得鴻儒往資潤色卿學輟閩輿
識洞幾微世參弼近之聯居稱文獻之美矧編摩之維
舊俾論譔以是宜茲峻陟於中臺爰兼華於直筆式符
妙選其畧謙辭所辭宜不允

四川宣撫使知成都府楊輔辭免不允詔

勅具悉朕惟妖孽就誅西陲甫定思得重臣以撫綏之

念非聲實素著無以鎮壓羣動非識度寬明無以并合
衆謀以卿德懋材全望高諸老故就分閫之寄申以宣
威之命朕又念賢者在朝何憂外郡之治直諫居內足
寢淮南之謀是用蔽之僉言趣其來覲屬方側席以竚
辰猶茲覽來章尚形讜避何也命召而不俟駕宜勉忠
誠未彊而可折衝冀收儒效所辭宜不允

安丙辭免轉中大夫端明殿學士知興州充利
州西路安撫使兼四川宣撫副使不允詔

勅具悉報非常之功者當隆於寵數撫新定之俗者難
徇於彞章卿力奮精忠手鋤元惡易危為安而在譚笑
固智畧之無前輟作傾耳以聽風聲諒人情之騷動乘
衆心之共憤復故壤以如携露布朝聞褒綸夕下陞華
書殿眎秩政塗豈惟彰體貌之優崇蓋亟藉威名之靜
鎮胡為剝牘尚爾控辭夫成功不矜已嘉任重之器先
事而慮勿忘善後之圖副予眷倚之深昭爾勲庸之茂
所辭宜不允

安丙再辭免端明殿學士中大夫知沔州充利州西路安撫使兼四川宣撫使不允詔

勅具悉朕惟定功行封以不踰時為貴任重致遠以能鎮物為先卿夙負奇才適遭多故率熊羆不二之士殄鯨鯢必戮之兇挺然忠誠皎若霜日談笑復秦關之險從容奠坤壤之安爰稽盟府之藏亟舉司勳之典坐閱一時之久猶勤再命之恭夫視秩政塗朕既親以心膂宣威閩外朕方寄以股肱宜思體貌之隆勿存形迹之

間亟祇茂渥益展壯猶所辭宜不允不得再有陳請

楊輔乞還田里不允詔

勅具悉朕惟國家平時儲養賢望正為一旦緩急之備
卿高風立懦厚德鎮浮踐敷三朝華皓一節留以遺朕
殆不偶然迺者孽臣敢圖不軌四隣震動西土繹騷惟
卿截然中居倡率諸道詞氣慷慨意度安閒誕揚先聲
與被密詔果兌渠之克殄迄并絡之載寧砥柱之屹中
流昔固嘉於素守疾風之知勁草今愈諒於純誠俾宣

外間之威全護坤維之重封圻畧定尤藉撫綏豈徒寬
西顧之憂抑俯徇蜀人之意抗章勇退非朕樂聞所請
宜不允

太皇太后遺誥

壽成惠聖慈祐太皇太后誥內外文武臣寮等予猥以
菲薄儷極阜陵獲執婦道以事高廟久承憲聖慈烈之
明訓親見聖子神孫之相授饗東朝之奉垂二十年皇
帝道繩祖武仁孝彌昭屬者就安內庭昏定晨省率禮

無闕賴天眷顧基祚方隆嘉與海內共底丕平永饗至
養而春秋逾邁疾疢乘衰皇帝衣不解帶憂形於色禱
祈醫療罔不疚懷定命有終莫施人力予年登七袞母
儀三朝深明夜旦之常尚何死生之憾皇帝宜念宗廟
之重勿過哀傷更賴二三大臣共為寬釋皇帝成服三
日聽政喪紀以日易月一依舊制行在文武臣寮十三
日而除百官入臨隨地之宜諸道府長吏以下三日
釋服軍民不用縞素沿邊不得舉哀釋服之後勿禁作

樂嫁娶應營奉等費並以壽慈宮錢物支給陵寢制度
務從儉省毋事煩勞餘依憲聖慈烈皇后故事施行故
茲遺誥想宜知悉

擬不傳建節襲封嗣濮王制

朕承詒燕之謀嗣延鴻之緒有懷英祖實基慶於濮園
爰暨熙寧俶疏封於王社眷言族老卓冠宗盟稽世襲
之闕規峻戎昭之異數誕敷制綍亶告廷紳具官某屬
近而行尊身端而行飭出神明之胄小九宗五正之傳

被儒雅之風躬兩獻二南之懿典刑前哲領袖洪支雖
當武公耄耄之年居靡忌於箴儆常持老子止足之計
動每戒於滿盈人知信厚之可師世謂康寧之未艾尚
綴廉車之秩久從間館之游朕惟源之深者流必長施
之豐者報亦厚歷考安懿百年之澤實開我家萬代之
祥幣玉牲牲奉寢廟四時之祭山川土宇恢郵城千里
之疆爾惟聞孫舊有令望宜踵承祧之典聿循賜履之
彝盤綬垂金賁苴茅之物采駢旌尊節新授鉞之威儀

申行戶租陪輸井賦以固維城之勢以侈前寧之休於
戲周尊同姓之盟以為之長漢列二等之爵其大者王
惟忠孝可以踵令猷惟謙恭可以永終譽祇承茂命益
介壽祺可

宇文紹節辭免兵部尚書不允詔

勅具悉古者六官之長皆取民譽蓋欲敷歷事任經營
四方使其名實孚於外而後選用重於朝朕以此意待
士夫至不薄也卿學輟聞奧才裕經綸體國憂時蚤登

禁列幹方盡瘁時號良翰久煩牧御之籌載錫召還之
節惟武部迺司戎之職尚書為納言之官在平時不輕
畀人矧多事尤當選擇其勉副艱難之寄毋過形謙挹
之辭所辭宜不允

宇文紹節辭免華文閣直學士知江陵府兼權
宣撫使不允詔

勅具悉昔在先朝若琦仲淹經理西事或受任以出或
毅然請行蓋大臣以身許國罔間中外然踐敬既久望

實益乎華夏聳聞其風采卒皆為名宰輔朕觀祖宗用人於是有攷焉卿忠孝自其家傳材學周於世用比年以來入從出藩其帥合肥則備禦修飭其鎮京口則兵民奠安嘉乃茂庸召寘邇列荆襄擇收復命建牙厥今邊陲雖銷而內治方急寬朕憂顧非卿誰可任者寵陞遽職承攝宣威卿其勿憚獨任朕屬任之意益厚矣亟祇成渙丕究遠圖所辭宜不久

宇文紹節辭免侍讀依舊華文閣學士宣撫使

兼知江陵府不允詔

勅具悉近臣體國固不以寵利為心公朝用人亦貴乎
名位之稱卿智畧輻輳忠節家傳屬當多事之秋屢懋
幹方之績荆襄重鎮吳蜀要衝蓋嘗畀卿以帥閫任宣
威之寄矣朕念西寇甫殄北敵更盛外禦內修此時為
急非擢正使領無以鎮撫邊徼非無華帝幙無以昭示
寵光成命既頒師虞允穆龜勉圖報乃卿職分謙引抗
辭匪朕所望也亟祇渙渥毋憚暑行所辭宜不允

趙淳辭免殿前司副都指揮使不允詔

勅具悉朕至公御下勸賞眦功矧方邊壘之未平尤藉
巖除而居重卿性資忠義智畧沈雄總禁旅於上游陟
使端於制閫屬寇戎之侵軼勵將士以扞防訖保堅城
不假外援肆疇偉績擢貳中權實允叶於衆心奚尚煩
於免牘夫出則任以方虎入則以為爪牙朕所倚毘又
豈特密護凝嚴而已折衝制勝將有賴焉報稱是圖搆
讒宜畧所辭宜不允

趙淳辭免特轉承宣使不允詔

勅具悉朕惟將帥因事乃見其材朝廷旼功而為之報
苟無以彰却敵安邊之績將何以勵忘身徇國之臣卿
夙著威名獨當憂顧扞堅城於十日之久摧強敵於百
戰之餘皆而方畧之竒保我金湯之固肆頒茂渥用勸
精忠峻陞畱務之班增竦轅門之望夫賞寧從厚朕固
知臣下之勤勞然安不忘危爾宜念功名之終始毋庸
多巽益展壯猶所辭宜不允

丘密乞守本官致仕不允詔

勅具悉祖宗之時貴德尚齒凡股肱之舊年至而不得謝或承顧問或備諮訪皆足以表儀中外而諸老大臣雖身處佚休迺心罔不在王室初未嘗以脫遺軒冕為高君臣之間誼斯兩盡朕心慕焉卿出際三朝望隆百辟起從珍館作鎮留都擢貳幾廷肇開督府茂著籌邊之績尤深體國之誠比以閔勞少安閒燕卿固何心於出處朕亦靡替於眷思胡為剡牘之聞遽上挂冠之請

惟今耆哲如卿幾人其悉至懷毋徇雅志所請宜不允
張巖辭免資政殿大學士知福州不允詔

勅具悉朕隆體貌之恩謹股肱之任故於大臣之去就
每務曲全其始終卿夙韜經濟之才再秉樞機之柄比
開懞府出領元戎夫總督之任固不專於議和然狂狡
之敵殆亦難於逆詐俾還位著尚賴惟籌洵覽奏封力
祈引避爰冠班於規殿仍分間於全閩朕於進退之際
可謂有禮矣寬我南顧勉爾民庸又以疾辭非所喻也

所辭宜不允

張巖再辭免資政殿大學士知福州不允詔

勅具悉厭二府之勞已從所欲宣四方之力盍勉汝為
卿蚤被簡知徧儀丞弼政賴折衝之畧遽騰引去之章
祕殿隆名恩實均於邇列全閩便郡職固異於臨邊為
爾相攸殆無過此尚思體國之誼勿事徇身之謀祇服
寵榮毋庸多遜所辭宜不允不得再有陳請

吳瑄乞祠祿不允詔

勅具悉昔漢馮野王以戚屬之賢擢左馮翊行能為二千石最然京師稱其威信亦必待歲餘而後有攷焉蓋用人無間於親疎成效皆責於久任卿蚤更中外頗著事庸繇四姓之貴侯典九畿之奧郡官箴恪守民政可觀曾閱時之未多遽抗章而求佚朕方鑒守長數易之弊厭將迎費蠹之煩其益懋於治聲毋重陳於異牘所請宜不允

樓鑰辭免復原職不允詔

勅具悉朕惟先朝壽俊初政侍臣眷懷不忘恩禮宜厚
卿學為羣儒之表望出諸老之間燕頤累年華皓一節
矧嘗冠文昌八座之班矣顧以微文未還寵職豈予尊
德尚齒之誼哉茲從真館之游盡復西清之峻雖身居
外服而心繫內朝匪徒加責於丘園蓋示不遺於故舊師
言允穆巽牘奚為所辭宜不允

費士寅辭免改差知潼川府不允詔

勅具悉卿西州偉望二府舊臣久煩制閫於邊陲為爾

相攸於便郡距粉陰之密邇視畫繡以何殊矧宣力四
方式符雅志而折衝萬里正藉老謀茲忽攬于撝章祈
退休於真館未為體國之誼夫豈圖安之時其略小嫌
佇聞異最所辭宜不允

楊次山乞休致不允詔

勅具悉昔漢竇長君不以富貴驕人陰侍中力以盈溢
辭位皆以后家同氣之至親而有恬養知足之高致書
之史冊今為美談卿屬近坤儀班尊尉府當此精神之

壯薦陳明哲之規眎漢二臣齊芳千載雖引年可尚而據禮未宜矧時方多虞情均休戚自圖便佚人謂斯何勉承眷倚之懷其畧好謙之牘所請宜不允

趙善堅辭免除工部侍郎無知臨安府不允詔勅具悉京師浩穰尤劇輦轂彈壓為先矧當多事之秋端以得人為重卿才猷強濟中外踐敷嘗奏最於神臯洵宣勞於民部比繇祠館起鎮制藩安田里之民枹鼓不警輯樓航之衆瀚海無波屬天府之掄才攷廷紳之僉

論顧惟已試之效莫如同姓之賢俾正橐班增峻事任
朕匪輕於弄印卿奚徇於循墻亟服茂恩勉圖偉績所
辭宜不允

趙善堅辭免招收禁軍特轉一官不允詔

勅具悉朕獎勵臣工靡愆爵秩所以示恩信章至公卿
夙負材猷再總浩穰恢乎游办藹然休聲恪奉詔條簡
稽禁旅既疇庸之來上於論賞以宜先峻陞寓祿之階
增重神臯之寄雖近臣體國罔寵利以為心然使人有

功豈封爵之不予亟祇成渙母事謙辭所辭宜不允

趙師曩乞祠祿不允詔

勅具悉京師浩穰古有難治之稱帥守屢更今以得人
為重惟卿才周世用識洞物情比歷三輔之雄輒為九
牧之最効見已試去思不忘故朕特輟邊閭之行復畀
神臯之寄庶藉威望不煩教條而閱時未幾百廢具舉
蓋多多而益辦豈數數之為嫌矧如精彊安有疾疢遽
有燕閑之請良非眷倚之懷昔翁歸以潔已抱公表於

近世廣漢以發奸摘伏名聞匈奴迹其有成悉繇久任
宜益圖於偉績顧奚徇於撓謙所請宜不允

趙師異辭免兼國用司參計官不允詔

勅具悉朕惟器之小者雖加之圭勺而已盈力之宏者
雖累以鈞石而不重卿智長於應變才裕乎撥煩再陟
地官著阜通之效三為天府高治辦之聲矧餉節之薦
更尤利源之熟究顧當今方急於財計而元宰亦提其
大綱參裨碩謀正倚宿望人所難者卿則易然更觀游

办之新宜畧循牆之避所辭宜不允

師垂再辭免除檢校少師不允詔

宗族內朝之愛名器天下之公朕固篤於親親然敢私於授受恩義兩盡僉言允諧屬者祲結重闡禍延太母德莫酌於罔極禮孰重於送終朕方居廬不得躬壽原之役卿以近屬而往宣使領之勤追竣事於因山訖寧神於清廟誕粵渙號庸獎成勞峻班列於孤卿隆表儀於同姓已攷詔諭猶執謙辭深嘉體國之衷難廢懋功

之典亟其祗拜勿復重陳所請宜不允

師垂辭免除知大宗正事不允詔

勅具悉古庶子官迺今宗正之任國家先選德望而位高屬近者特隆其名蓋將以表儀內朝助我睦族不徒尊貴之而已卿性資邁爽履行溫純蚤屢試於事功晚遂安於閒燕朕念近支之賢宜在左右司宗虛次亟以命之矧而先王嘗典厥職視漢歆向父子亦何愧焉勉迪令猷毋庸多遜所辭宜不允

陸峻乞祠祿不允詔

勅具悉惟我祖宗尊賢貴老無愧三代之盛王者哲居
朝前後相望史冊可攷卿器識閎遠德履粹夷簡在朕
心十年於此晉列六官之長益儀百辟之瞻屬時疆場
之多虞正賴謀猷之入告共圖銷弭迄底安強胡為上
章遽欲引去雖嘉止足之誼良非眷倚之懷矧氣貌精
神殆少壯所不及勿思自逸勉為朕留所請宜不允

陸峻辭免除權禮部尚書不允詔

勅具悉春官宗伯之職兼夷夔之任所以辯上下之分
洽神人之和非學通古今識明制作孰能居之卿業擅
醇儒名高禁路憲府肅抨彈之奏刑曹助欽恤之仁迨
無直於瑣闥尤聳聞於批敕踐敷滋久獻納居多比虛
位於秩宗將疇才於宿望久焉弄印無以踰卿昔魯國
秉禮而彊敵威懷叔孫制儀而悍將讐服得人而重自
昔以然勉迪令猷毋庸多遜所辭宜不允

賜叅知政事李壁生日詔

迎長嶰籥甫踰決日之期鍾秀岷山適紀誕辰之慶方
躋榮於兩社實宣力於萬機宜舉賜章式綏壽嘏

賜太尉保大軍節度使李孝純生日詔

析木在辰俶正孟冬之序垂弧紀旦誕鍾戚屬之賢方
開尉府之華益介琳宮之祉載盼臺飽式燕家庭

生日賜生餼詔

石泉槐火之新屬當令序蓬矢桑弧之設載誕鴻儒方
賴經綸聿隆體貌頌餼牽於御府助燕喜於私庭益介

壽祺永扶昌運今賜卿生日羊酒米麵等具如別錄至可領也故茲詔示想宜知悉

賜安南王李龍翰加恩制告書

勅安南國王李龍翰九秋叶吉五室歲儀荷上帝之博臨豈靈釐之專饗眷言南服為我世臣爰疏制縛之榮併致恩頒之厚祇承寵數益懋忠圖

高飛卿辭免戶部侍郎依舊淮西總領不允詔勅具悉轅門總餉委任匪輕若軍旅繁興則難易百倍

卿清規亮節中外聳聞將指西淮朕所親擢方多虞之際調度四出用無乏興士得宿飽擢貳民部增重使權今既數月矣夙夜勤瘁綜理密微威信交孚卒乘輯睦肆嘉乃績就俾為真厥今敵騎雖已引卻而邊瑣尚須調護夫規摹一定非可數更而事功垂成詎容中止此朕固以煩卿而非徒以寵卿也上章諗疾匪朕攸聞所辭宜不允

吳獵乞罷黜不允詔

勅具悉朕惟艱難多事之秋必得魁壘濟時之彥具材
力足以禦卒變其器度足以包羣豪迺能合智并謀折衝
厭難卿夙負兼全之畧久分方面之權義旅雲從威聲
遠愴朕念班爵崇則事任稱委寄隆則臨制廣是用陞
之次對付以宣威迄屏扞於上流遂肅清於窮寇亟晉
秋官之貳俾專使領之雄屬戡定於西陲宜將明於德
意徒得君重勉為朕行此誠忘私徇國之時胡以引咎
乞身為請亟其叱馭勿復重陳所請宜不允

張澤辭免寶謨閣直學士宮觀不允詔

勅具悉朕於侍從之臣進退以禮所以全恩遇勵節行也卿性質端靖議論正平擢居禁近之聯備罄猷為之益起之閒地畧以輔藩惟知平易以近民不飾厨傳以要譽屬時多事正藉老謀亟頒召音庸副虛佇乃力伸於祠請願莫奪於冲懷爰陞西清學士之班以寵文昌八座之舊雖云彞典亶謂優賢尚毋忘畎畝之忠豈特示丘園之責祇予成命奚事勞謙所辭宜不允

陳杞辭免寶謨閣直學士致仕不允詔

勅具悉知止足者人臣之高致全體貌者朝廷之茂恩
卿禁密之臣典刑之舊燕熙滋久年德俱高方有賴於
詢猷遽力祈於謝事寵陞祕職勉徇冲懷然身在林泉
之間而名列西清之籍豈特華其歸老盖曲示於優賢
亟服徽章毋煩巽牘所辭宜不允

蕭遼辭免招收福建路效用水軍數足特轉一
官不允詔

勅具悉操爵賞之柄示激勸之公雖予侍臣有勞必錄
卿器資端靖學職純明頃繇文昌分閩閩部有平易近
民之政賦中和樂職之詩輸積募徒不擾而辦朕久知
其為君子之才也肆疇茂績進陟崇階茲覽奏封力形
謙避嘉爾體國之誼匪予懋功之心其即欽承式圖報
稱所辭宜不允

欽定四庫全書

集部

後樂集卷六

詳校官庶吉士臣翁樹培

主事臣呂雲棟覆勘

謄錄監生臣沈霽

欽定四庫全書

後樂集卷五

宋 衛涇 撰

內制

賜端明殿學士簽書樞密院事督視江淮軍馬
丘宏臘藥勅書

勅卿以右府之耆英專督軍之重任臘寒方力籌幄良
勞頒上劑於寶奩示中宸之密眷益資冲輔勉究茂勲
賜成都潼川府夔利路安撫使程松臘藥勅書

金定四庫全書
卷五
勅卿以西樞之望撫全蜀之師方衆烈之蕭辰實注懷
於舊德往頒珍劑益輔冲襟

賜資政殿學士知潼川府費士寅臘藥勅書

勅卿望隆廊廟任重翰垣屬寒籥之方深軫眷懷而良
厚趣頒嘉劑以介珍調

賜兩浙東路安撫使錢象祖臘藥勅書

勅卿望高兩社任重十連屬冰雪之蕭辰睇蓬萊而注
想宜頒良劑加衛冲襟

賜端明殿學士湖北京西宣撫使薛叔似臘藥
勅書

勅卿視儀政路增峻中權方栗烈之蕭辰實注懷於舊
德往頒珍劑益輔冲襟

賜工部侍郎兼樞密都承旨樞密行府參贊軍
馬吳總寶謨閣待制湖北京西宣撫使陳謙臘
藥勅書

勅卿席寵禁塗贊謀督府方嚴凝之屆序念匱薄之良

勞宜有珍頒以昭眷遇

賜鎮江府駐劄御前諸軍都統制山東京東路
招撫使郭倪臘藥勅書

勅卿內嚴巖衛外總師干當寒籥之蕭辰錫寶奩之名
劑益綏爾衆均識朕恩

賜主管殿前司公事真州駐劄策應兩淮郭果
臘藥勅書

勅卿總嚴凝之衛提犄角之師屬此盛冬錫之名劑其

推上澤均洽士心

賜侍衛馬軍行司主管侍衛馬軍行司職事戚拱
御前諸軍都統制田琳董世雄趙淳御前諸軍
副都統制馮拱陳孝慶魏友諒彭輅毋思畢再
遇臘藥勅書

勅汝等分總戎昭力推寇虐屬嚴凝之在候念蒙犯之
惟艱爰賜奩珍式昭恩意

賜宣撫使程松銀合湯藥勅書

勅程松商颺屆候邊地蚤涼眷吾斗極之英盡撫坤維
之衆比聆凱奏深獎竒勲既虎視於三秦諒鷹揚於萬
旅惟茲多算悉稟成謨載疇玉帳之勞爰錫寶奩之劑
益加攝衛迄濟規恢

賜御前諸軍都統制王大節孫忠銳夏藥勅書
勅汝等任隆將閫威懾邊陲涉九夏之炎歎撫三軍而勞
勩放之珍劑賁以寶奩其推廣於惠心俾均霑於部曲
賜御前諸軍副都統制魏友諒莊松王鉞王大

才等夏藥勅書

勅汝等分縮兵符克清邊陲貳元戎之統御履九夏之
炎蒸爰放奩劑之良庸示轅門之寵

賜御前諸軍副都統制馮拱夏藥勅書

勅馮拱汝禁旅分屯方肅清於海淑采薇久戍嗟載涉
於炎蒸嘉而控禦之勤軫我眷懷之切特放珍劑庸示
異恩

賜寶謨閣學士通奉大夫四川制置使知成都

府楊輔銀合夏藥

勅楊輔卿夙推舊德就撫蜀都雖渴見於儀刑念莫踰
於望實倏更炎序彌軫眷懷往頒奩劑之珍式助生經
之衛勉寬憂顧佇俟來歸

賜池州駐劄御前諸軍都統制秦世輔銀合夏
藥

勅世輔汝茲膺親擢往護上流念征馭之良勞屬炎歊
之屆序往放珍劑以衛生經其欽體於眷懷尚克修於

戎律

賜興元府駐劄御前諸軍都統制彭輅銀合夏

藥

勅彭輅汝甫膺親擢往貳戎昭念征馭之良勤屬炎歊
之屆序錫之良劑示我眷懷尚寬西顧之憂亟底邊陲
之靖

賜江州駐劄御前諸軍副都統制兼知光州劉

光鼎銀合夏藥

勅光弼汝分提禁旅往護邊城方征馭之良勤屬炎歊
之屆序亟放珍劑以衛生經其撫勞於兵民以肅清於
氛祲

賜端明殿學士中大夫知興州充利州西路安
撫使兼四川宣撫副使安丙夏藥

卿勲書彝職亞機衡分重寄於坤維愴皇靈於關塞
諒精忠之有相豈寒暑之能侵往放奩劑之珍庸示宸
旒之眷

賜建武軍節度使沔州駐劄御前諸軍都統制
王喜夏藥

卿峻陟齋壇寵膺將鉞親提王旅克復秦關當凱奏之
還歸諒暑行之勞勤爰攷良劑式示至懷

賜侍御馬軍行司職事戚拱夏藥

卿駟駿分屯護我陪都之重貌貅久戍履茲炎夏之辰
載嘉扞禦之勞深軫眷懷之厚往頒靈劑尚體茂恩

賜御前諸軍都統制趙淳畢再遇田琳等夏藥

汝等任隆閫制勲茂戎昭屬氣序之炎敵撫兵民而勞
勩放之珍劑賁以寶奩其推廣於惠心俾均霑於部曲
賜御前諸軍都統制董世雄夏藥

汝禁旅分屯夙護上流之險采薇久戍載更瘴暑之炎
嘉而扞禦之勤軫我眷懷之切特頒珍劑庸示茂恩

賜知樞密院事督視江淮軍馬張巖夏藥

卿制勝籌幄夙倚紫樞之望撫師江許屬臨朱籥之辰
諒底定之有期嘉旋歸之匪日爰賜上奩之劑式昭中

宸之恩

賜資政殿學士知潼川府費士寅夏藥

卿舊弼撫藩夙倚折衝之略朱焯屆序載嘉盡瘁之誠
爰軫眷懷往頒靈劑庸輔節宣之適迄圖綏靜之勲

賜華文閣學士中大夫知江陵府湖北京西宣

撫使宇文紹節夏藥

卿出藩入從復宣間外之威當夏問涂倣履離明之序
周爰靡止嘉歎不忘頒上劑以輔和宜疾驅而毋憚

賜寶謨閣待制四川制置使吳玠夏藥

卿宣威北塞方疇漢水之勲分閩西陲復借雪山之重
炎蒸屆候徒御實勞錫上劑之珍良輔冲襟於區薄

賜督視行府參贊軍事沈作賓夏藥

卿通班禁路贊畫元戎就分北固之符適踐南訛之候
賢勞備著睠軫良深宜放奩劑之珍往致冲襟之輔

賜沔州駐劄御前諸軍副都統制李好義銀合

夏藥

勅好義汝比建殊勲分提勁旅屬撫循之良勩適炎燠之
御辰其放奩劑之珍庸示眷懷之渥益殫忠蓋迄靖邊
氛

賜象祖斷章批答口宣

有勅朕疇望經帷登賢政路士喜端人之復用民欣舊
德之來歸其勉罄於謀猷勿過形於遜避

賜李壁斷章批答口宣

有勅朕妙柬儒猷晉參國秉已趣放於成命實允穆於

師虞其畧謙函亟祗寵渥

賜張巖斷章批荅口宣

有勅朕儀圖舊德擢冠鴻樞方衆聽之具孚宜壯猷之
亟展其蠲異牘以對龍光

宣勞將士口宣

有勅卿汝等克修戎職祗護明禋眷言區薄之勞深見
忠勤之助迄臻熙備良用歎嘉

賜皇子崇王告口宣

有勅朕敬共明神稱秩元祀眷言上嗣克覲稷容宜先
祭澤之頌益行璇源之慶

賜嗣秀王告口宣

有勅備成熙事誕舉慶條有嘉族老之賢克相宗祈之
典茲頌茂渥共對闕休

賜少傅吳環告口宣

有勅竣祠重宇沛澤剛辰載嘉肺腑之英聿相亘邊之
事其祗餽惠茂介神釐

賜少保謝淵告口宣

有勅告成元祀敷錫蕃釐嘉時左戚之賢克相上儀之舉欽承祭澤亟報恩徽

賜太尉楊次山加恩告口宣

有勅宗祈間舉熙事備成眷言姻屬之賢宜被神釐之賜亟祇寵渥益介壽祺

賜三省官滿散瑞慶聖節道場乳香口宣

有勅誕序發祥臣工歸美嘉元台之率屬集勝果以儲

休爰錫寶熏用旌善禱

賜太尉李孝純加恩告口宣

有勅卿以母黨之賢相宗祈之禮式遵彝典茂舉慶條
晉荒公社之封仍衍爰田之賦亟秬命緯庸壯戚藩

賜保成軍節度使譙令雍加恩告口宣

有勅合宮竣事宣室均釐眷潛邨之舊臣陪近班而相
禮宜敷惠術亟服恩綸

賜保信軍節度使吳琰加恩告口宣

有勅季秋序正宗祀禮成眷戚晚之雋臣實外家之尊
行宜膺慶澤祗服恩綸

賜師垂批答口宣

有勅卿地居尊屬任重宗盟比旌使範之勤庸晉孤卿
之秩已孚成命其畧撫函

賜師垂告口宣

有勅眷時伯父夙糾宗盟屬祖后之因山參史華而歲
事式遵彝典晉眡亞師其祗服於鴻私尚永綏於燕譽

賜前參知政事錢象祖到闕傳宣撫問并賜銀
合茶藥口宣

有勅朕渴思舊弼召自東藩三節延佇於疾驅一葦喜
聆於利涉迎加郊勞寵錫奩珍

賜殿前司滿散瑞慶聖節道場乳香

有勅環尹輸忠式際發祥之慶華封效祝載嘉歸美之
誠錫以寶芬助其善禱

賜步軍司散滿瑞慶聖節道場乳香

有勅提羽林之衛圖報上恩祝虹渚之祥載嘉臣節爰
頒寶炷用表忠忱

賜馬軍司散滿瑞慶聖節道場乳香

有勅華渚流虹慶承天祐建章飭騎虔效嵩呼載績異
熏用循彝錫

賜樞密院官等滿散瑞慶聖節道場乳香

有勅十月為陽千秋紀節迺睠鴻樞之輔聿嚴鷲嶺之
祈頌以異芬表其忠悃

又

有勅卿等任隆樞極心拱辰居祝君壽於南山演佛乘
於西竺肆放馨烈庸獎忠勤

賜樞密院官瑞慶聖節御筵酒果

有勅星渚流祥共伸善頌雲天洽燕爰錫豐恩特遣分
盼聿資樂愷

賜三省官滿散瑞慶聖節道場乳香

有勅誕序發祥臣工歸美嘉元台之率屬集勝果以儲

休爰錫寶熏用旌善禱

賜三省官瑞慶聖節御筵酒果

有勅堯年伸祝百辟同誠周宴示慈多儀疏渥載盼芳
旨庸表龍光

賜三省官等滿散瑞慶聖節道場乳香

有勅卿等位冠臣工心存君上屬流虹之紀節輔靈鷲
以祝釐爰錫寶籙助成聖會

文武百寮奏請皇帝聽政不允批答

省表具之朕追懷內殿問安之時嘗見三宮席慶之盛
念茲皇祖實貽後嗣之燕謀屏予一人獨有重闈之慈
覆欲報含飴之德甫諧移御之歡不弔昊天降此大罰
共寢門之色養為日幾何愴奕世之母儀於今盡矣朕
屬以元孫而祗通思昭大孝於繼承即廬次以執喪罔
然在疚臨法宮而親事非所忍聞所請宜不允

文武百寮再奏請皇帝聽政宜允批答

省表具之朕自罹東朝之憂甫畢西階之殯故不釋經

帶而過毀方執通喪雖內修政事以攘邊未遑總覽而封章狎至忱請弗渝期俯徇於輿言以仰承於遺旨夫自庶人而至天子孰無慈蔭之思然執小節而阻羣情亦懼繁幾之曠勉遵聽理良奪孝誠所請宜允

文武百寮三奏請皇帝御正殿復常膳宜允批

答

省表具之朕惟成湯罪己以興邦宣后側身而復古退循菲德慨慕前猷雖邊祲之潛銷豈予心之遑逸夙夜

祇懼當如敵國外患之猶存上下交修益以鳩毒宴安
而自倣游覽復常之奏備嘉尊主之誠臨大昕之朝敢
忽苞桑之戒御中是之食采深嘗膽之思茲勉徇於輿
情尚共圖於丕績所請宜允

明堂大禮祭饗冊文

昊天上帝

伏以清明上圓照臨下土三光猶軌五位時序惕惟冲
眇嗣承歷服夙夜祇畏罔敢怠豫物成季秋適嚴報本

犧牲玉帛於薦純潔饗道助順惟皇無私迄圖駿功祈
永休命

皇地祇

伏以至哉坤元厚載無疆母育萬彙配天其澤合祛修
報祗率彝典黜牲黃琮貴純尚質來顧來饗此心對越
蠢茲荒裔亂我中土百年於今民厭其德闡靈右順永
清四海

太祖皇帝

伏以五季濁亂腥聞於天篤生聖人時維烈祖肇造區
夏挈提皇綱無疆歷服貽我後嗣施及冲昧獲膺傳序
季秋宗祀陟配上帝思昭大謨圖復舊物綏予孝子克
成厥勲

太宗皇帝

伏以宋有成命二后受之於昭宗德克篤祖功混一文
軌乾坤清夷丕哉基緒惠我無疆肆予冲人獲主裡祀
歷吉季商禮嚴並侑顯承謨烈紹復是期對越在天迄

用大介

明堂大禮告五嶽文

伏以諏辰商律歲事總章維嶽之章靈氣攸宅敢徵
施迄濟休成

告四瀆文

伏以涓吉季商歲事重宇瀆祇有赫潤澤無窮敢覲
祥迄相裡祀

明堂大禮前二日朝獻景靈宮分詣奏告中殿

後殿文

伏以祗修宗祀夙歛闕宮惟真館之邃清仰神靈之安
妥躬嚴朝獻分命侍祠敢冀鑒觀默垂綏佑

祭九宮貴神文

伏以誕修邦禮躬嚴重屋之祠敬事天神分敕九宮之
薦庶靈游之來格綏下土於丕平

祭社稷文

伏以大饗合宮百神咸秩瞻言五土德被生人有國是

尊即壇藏事式嚴昭報永格靈釐

祭后土句龍氏文

伏以歲屬親祠禮嚴宗祀欽惟土正有德有功生民具依克禋克祀牲醴以告其永降康

明堂大禮前二日奏告太祖皇帝太宗皇帝配

享文

伏以祗承鴻業間祀總章昭天地以合祛奉祖宗而並侑乘季商之穀旦闡列聖之彌文先事告虔仰祈靈監

明堂大禮前一日朝享太廟祀七祀文

伏以親祠路廷夙禱清廟有嚴列聖之饗聿修七祀之儀神其來歆相予熙事

明堂大禮畢謝五嶽四瀆文

伏以仰乾坤之覆幬惟嶽瀆之高深迴隔封圻阻修望秩茲備成於熙事舉昭報之彝儀尚祈陰陽之休迄底侵疆之復

奏謝恭淑皇后文

伏以席累聖之休靈承景命卜季商之吉間舉宗祈逮
茲禮典之成均被神釐之錫賸言淑範嘗表中闡瞻北
域以興懷薦苾芬而昭謝

祭謝東嶽東海南嶽南瀆文

伏以陽館肇裡既備一統之薦陰靈默相敢修三望之
誠爰祗率於舊章用丕昭於景貺更祈孚佑永庇函生
祭謝會稽山永濟王文

伏以季秋中辛總章大饗賴羣靈之陰相迄熙事之備

成瞻言名山近在左浙往致齊明之薦庸伸昭謝之誠

太皇太后謚冊寶前一日告於太廟

伏以詒謀燕翼愴慕層闈議行誅功受成清廟爰登徽冊永著鴻名祇率舊章以八月一日上大行太皇太后尊謚曰成肅皇后不敢不告

太皇太后謚冊寶前二日奏告天地宗廟社稷
太乙宮

伏以太皇太后婦儀母範燕及三朝節惠尊名貽諸百

世廼羣臣請謚於宗廟曰成肅皇后登崇寶冊明著徽稱典禮有嚴先期以告

太皇太后標劄神穴除去有礙窠木籬牆奏告

諸陵表

伏以慈儀厭世祗飭寢園神穴因山密隣隧域屬庀工而經始敢先事以告嚴冀上妥於威靈庶默敷於蔭祐

皇帝行啟奠禮

伏以慈壺纏哀寢陵歲事甫臨遠日爰啟最塗肆陳六

綈之儀恭致兩楹之奠攀號罔及推割奚勝

皇帝行遷奠禮

伏以甫違祖載已次壽原當復土之有期痛終天之永訣恭陳奠葦式薦哀誠

太皇太后梓宮發引前一日初更總護使行夜奠禮

伏以繫結層闈哀纏率土既畢方中之利倏臨祖載之期歔衛夙陳奠觴夕薦三靈不吊五內俱糜

太皇太后梓宮發引掩攢文

伏以制畢因山時臨掩隧神升絳闕上參列聖之遊地
拱阜陵穆卜千秋之永攀依靡及哀慕奚窮

成肅皇太后虞祭禮畢行卒哭文

伏以日御遙流颺游浸遠既卒無時之哭爰遵易吉之
儀茲卜剛辰祗成薦事

太皇太后梓宮發引掩攢宮奏告安奉御容文

伏以文母上賓漢瑩蓋祔屬幽宮之揜隧即別殿以寧

神對越在天永綏厥後

遷祖宗神主於初獻廳權奉安前時奏告

伏以祖后賓空壽原叶吉庀役將嚴於主祔奉迎期妥於神游先事告虔惟靈安妥

前時奏告別廟

伏以祖后賓空壽原叶吉妥修崇於主祔將升奏於神游先事告虔惟靈安妥

前時奏告四祖

伏以重闡棄養將升奉於神游太室考儀爰修崇於主
祐方工徒之庀役祈列聖之妥安涓日惟良先時以告

前二日奏告天地宗廟社稷宮觀

伏以祖后恩深追思罔極宗祧事重升祔有期載嚴齋
告之誠仰冀妥安之佑

奏告宗廟

伏以慈養永違甫畢壽原之奉神遊如在將升清廟之
嚴敢告先期尚祈歆顧

祭告太廟土地

伏以棲神廟祔庀役事嚴方繕治之云初冀威靈之默
祐先期以告迄惠於成

權奉安奏告

伏以太室考儀將嚴登祔有司庀役式謹繕修爰蠲告
於齋庭覬安安於主祔嗣嚴寅奉永底宴娛

--	--	--	--	--	--	--	--